

**Wacana Pemikiran dan Pembinaan Ummah:
Gerakan Tajdid & Pemikiran Najdiyyin**

Di
Masjid Wilayah Persekutuan, Kuala Lumpur

**Tajuk:
Wacana Religio-Intelektual Najdiyyin: Pro & Kontra
Terhadap Peranannya pada Tamaddun Ummah**

Oleh:
Dr. Asmadi Mohamed Naim¹
Profesor Madya
Universiti Utara Malaysia
24 Januari 2010

Abstrak:

Artikel ini bertujuan menjelaskan aliran Gerakan Najdiyyin dengan merujuk secara khusus pembawaan Sheikh Muhammad Abd al-Wahhab dan alirannya. Artikel ini cuba untuk memahami siapakah pendokong, penyanggah dan mereka yang agak pertengahan dalam mengkritik beliau. Artikel ini juga mendatangkan isu-isu yang diperjuangkan oleh Sheikh ini dan beberapa tuduhan oleh pihak penentang. Pandangan penulis dalam artikel ini adalah dengan merujuk buku-buku pendokong dan penyanggah aliran ini. Di akhirnya penulis membentangkan beberapa isu yang mungkin akan meneruskan ketidaksepakatan dan fitnah berterusan antara kedua-dua pihak. Semoga Allah SWT mengurniakan kita jalan yang lurus.

¹ Penulis ialah Profesor Madya (Kewangan Islam) di Kolej Perniagaan, UUM dan boleh dihubungi melalui emel asmadinaim@gmail.com dan keterangan lanjut mengenainya boleh didapati di www.drasmadinet.blogspot.com.

1.0 PENDAHULUAN

Aliran Najdiyyin yang dimaksudkan dalam artikel ini ialah pemikiran Sheikh Muhammad Abd al-Wahhab (1115H – 1206H bersamaan 1703M-1787M) dan pengikut-pengikut aliran pemikirannya sehingga ke hari ini.

Dalam memberikan pengklasifikasian terhadap pendokong pemikiran ini, terdapat sedikit kesukaran dalam menentukan individu yang mendokong atau individu yang menentang. Kesukaran berlaku kerana terdapat ulama-ulama semasa yang menyetujui pembawaan Sheikh Muhammad Abd al-Wahhab dalam beberapa perkara, tetapi menafikan mereka menyetujui kesemua pembawaan Sheikh tersebut.

Demikian juga, ramai ulama lain lebih selesa menyandarkan pandangan mereka kepada Imam Ibn Taymiyyah atau Imam Ibn Qayyim, berbanding dengan pandangan Muhammad Abd al-Wahhab. Sebagai contoh, penulisan Sheikh Yusof al-Qardhawi banyak merujuk terus kepada Imam Ibn Taymiyyah berbanding dengan aliran Muhammad Abd al-Wahhab. Bahkan Sheikh al-Qardhawi tidak bersikap 'mengkafir atau menyekat' Ahlusunnah wal Jamaah aliran Asyairah dan Maturidiyyah.

Demikian guru saya, Dr Abu Laith Kharul Abadi, walaupun banyak menggunakan pandangan Ibn Taymiyyah dan Ibn al-Qayyim, beliau masih mengklasifikasikan Asyairah dan Maturidiyyah sebagai fahaman Salaf.

Lebih menyukarkan lagi, sesetengah ulama-ulama semasa menyedari adanya sokongan kuat dari sesebuah negara terhadap aliran ini. Justeru, untuk mengelak dari kelihatan mengkritik sesuatu negara, mereka 'bermujamalah' tetapi dalam masa yang sama mengemukakan hujah menolak satu-persatu pegangan aliran ini.

Justeru, artikel ini hanya berupaya menyenaraikan pendokong atau penyanggah yang tegar iaitu mereka yang secara terang-terangan mendokong atau menyanggah pandangannya.

2.0 PANDANGAN PENDOKONG:

Secara ringkasnya, antara tokoh-tokoh semasa yang berpegang kukuh kepada pendekatan aliran Sheikh Muhammad Abd al-Wahhab ialah Sheikh Abd al-Aziz Ibn Baz, Dr. Abdullah al-Salleh al-Uthaimin, Dr Saleh Fauzan al-Fauzan dan lain-lain.

Muhammad Zakaria Daud² menukilkan dalam kertas kerja, sokongan beberapa ulama terhadap Sheikh Muhammad Abd al-Wahhab, antaranya ialah al-Zirkili (pengarang kitab al-I'lam), Syeikh Muhammad al-San'ani (pengarang kitab Subul al-Salam) dan Muhammad Ali al-Syaukani (pengarang kitab Nail al-Autar) serta Muhammad Rasyid Redha.

Para pendokong aliran ini berpandangan aliran ini mendokong perkara-perkara berikut:

² Zakaria @ Mahmud Daud (2006). 'Muhammad Ibn Abdal-Wahhab Pro dan Kontra' dalam Johari mat et.all. *Ahlussunnah wal Jamaah Arus Perdana*. Kota Bharu: Dian Darulnaim Sdn. Bhd. H. 138-141.

1. Berkenaan tauhid Uluhiyyah dan furu'nya seperti istighathah, berdamping kepada selain daripada Allah, tawassul, nazar, sembelih, bersumpah dengan makhluk dan sebagainya.
2. Menekankan mengenai Tauhid al-Asma' was sifat.
3. Muhammad bin Abd al-Wahhab menentang khurafat dan bid'ah
 - i. Pemujaan terhadap kubur, pokok, batu serta memohon hajat daripadanya.
 - ii. Maysrakat di negeri Najd memuja dan memohon hajat daripada kubur Zaid Ibn al-Khattab dan Dirar al-Azwar, dengan keyakinan ia boleh menunaikan hajat.
 - iii. Memuja pokok-pokok tamar jantan yang besar, jika seorang perempuan lewat kahwin dia akan pergi ke pokok berkenaan lalu memeluk dan memohon hajat daripadanya seraya berkata: Hai jantan segala jantan! Aku inginkan seorang suami sebelum habis tempoh.
 - iv. Di Daerah Dir'iyah (bahagian selatan negeri Najd) terdapat sebuah gua yang idakwa terbentuk untuk menyelamatkan seorang wanita yang teraniaya, dikenali Bint al-Amir, lalu mereka memujanya dengan menghantar dan meletakkan makanan seperti daging dan roti di dalamnya.
 - v. Di daerah yang sama ada seorang lelaki yang dikenali dengan nama Taj

Al-Mandeely mengatakan:

*Kebanyakan masyarakat Islam ketika itu sentiasa berulang alik ke kubur-kubur yang didakwanya sebagai kubur para sahabat dan para wali. Tanpa disedari mereka melakukan upacara ibadat yang tidak selayaknya melainkan untuk Allah seperti bernazar, tawaf, meyembelih, meminta tolong dan sebagainya. Mereka seolah-olah tidak mengenal Allah. Apabila ditimpa musibah atau sakit, maka mereka akan menjerit-jerit menangis berdoa dan meminta tolong di kubur-kubur.*³

3.0 PANDANGAN PENGKRITIK DAN PENYANGGAH

Terdapat ramai ulama yang mengkritik aliran Wahhabi. Ulama-ulama semasa yang mengkritik aliran ini ialah Imam Abu Zahrah, Prof. Dr Ramadahan al-Buti, Prof. Dr Muhammad Alwi al-Maliki, Prof. Dr Abd al-Malik al-Sa'di (bekas Mufti Iraq)⁴ dan lain-lain. Shekh Muhammad Fuad Kamaluddin⁵ menyenaraikan nama 100 orang ulama dan penulisan mereka yang menolak fahaman Sheikh Muhammad Abd al-Wahab.

Dalam teks di bawah, iaitu Mufti Mazhab Hanbali di Mekah (wafat 1295H), Syeikh Muhammad ibn Abdullah al-Najdi al-Hanbali pernah menulis dalam kitabnya 'al-Suhub al-Wabilah 'ala Daroih al-Hanabilah'⁶ sepertimana berikut:

³ Abdul Qadeer al-Mandeely (1994). 'Syeikh Muhammad Abd. Wahhab dan dakwahnya' dalam *Tokoh-tokoh mujaddid Islam*. Kajang: Badan Perkhidmatan Penerangan Islam Selangor dan Wilayah Persekutuan (BPPI). H. 83.

⁴ Pandangan Dr. Abd al-Malik al-Sa'di boleh didapati dalam bukunya: *al-Bid'ah fi al-Mafhum al-Islami al-Daqiq* (2008). Karak: Matba'ah al-Azhar.

⁵ Muhammad Fuad Kamaluddin (2004). *Wahhabisme: Dari Neraca Syara'*. Rembau: Madrasah al-Taifiqiah al-Husainiah. h. 153-165.

⁶ Para 415.

٤١٥ - عبد الوهاب بن سليمان بن علي^(١) بن مشرف بوزن محمد التميمي النجدي .

قرأ في الفقه على أبيه صاحب المنسك المشهور وعلى غيره وحصل وتفقه ودرّس وكتب على بعض المسائل الفقهية كتابة حسنة توفي سنة ١١٥٣ وهو والد محمد صاحب الدعوة التي انتشر شررها في الآفاق لكن بينهما تباين مع أن محمداً لم يتظاهر بالدعوة إلا بعد موت والده وأخبرني بعض من لقيته عن بعض أهل العلم عن من عاصر الشيخ عبد الوهاب هذا أنه كان غضباناً على ولده^(٢) محمد لكونه لم يرض أن يشتغل بالفقه كأسلافه وأهل جهته ويتفرس فيه أن يحدث منه أمر فكان يقول للناس ياما ترون من محمد [من الشر]^(٣) فقدر الله أن صار ما صار وكذلك ابنه سليمان أخو الشيخ محمد كان منافياً له في دعوته ورد عليه رداً جيداً بالآيات والآثار لكون الردود عليه لا يقبل سواهما ولا يلتفت إلى كلام عالم [متقدماً أو متأخراً]^(٤) كائناً من كان غير الشيخ تقي الدين ابن تيمية وتلميذه ابن القيم فإنه يرى كلامهما نصاً لا يقبل التأويل ويصوب به على الناس وإن كان كلامهما على غير ما يفهم وسمى الشيخ سليمان رده على أخيه فصل الخطاب في الرد على محمد بن

Bermaksud: Beliau (Abd al-Wahhab) adalah bapa kepada Muhammad ibn Abd al-Wahhab seorang pendakwah yang menyebarkan kejahatannya ke seluruh pelusuk dunia. Tetapi di antara mereka (bapa dan anak), terdapat perbezaan yang ketara. Muhammad tidak menzahirkan dakwahnya melainkan selepas bapanya meninggal dunia.

Dikhabarkan kepada saya oleh sebahagian ulama sezaman dengannya yang pernah saya temui, bahawa bapa Muhammad ibn Abd al-Wahhab amat marah kepadanya kerana beliau tidak redha Muhammad ibn Abd al-Wahhab hanya sibuk mempelajari feqah seperti orang-orang yang terdahulu dan penduduk di tempatnya. Beliau juga berfirasat bahawa akan terjadi sesuatu yang buruk kepada anaknya.

Begitu juga Sulaiman yang merupakan adik kandung Sheikh Muhammad menafikan dakwah yang dibawa oleh abangnya, dan menolaknya dengan hujjah yang baik bersumberkan ayat-ayat dan athar-athar. Dan Muhammad ibn Abd al-Wahhab tidak merujuk kepada pendapat ulama mutaqaddimin atau mutaakhhirin tetapi hanya merujuk kepada pandangan Sheikh Taqiyuddin Ibn Taymiyyah dan anak muridnya Ibn al-Qayyim. Beliau melihat pendapat kedua-dua orang ulama tersebut sebagai suatu nas yang harus diterima bulat-bulat dan tidak boleh ditakwilkan, sekalipun tidak difahami. Oleh kerana itu, Sulaiman menulis kitab untuk menolak fahaman yang dibawa oleh saudaranya yang dinamakan dengan: *Fasl al-Khitab fi al-Radd 'ala Muhammad Ibn Abd al-Wahhab*.

Dapat difahami di sini, adik Sheikh Muhammad ibn Abd al-Wahhab juga menentang pemikirannya.

Dalam memperkatakan kritikan terhadap Gerakan Aliran Wahhabiyah, saya tertarik dengan penjelasan Imam Muhammad Abu Zahrah. Beliau mengatakan yang bermaksud:

Telah lahir Wahhabiyah di Gurun Sahara Arab disebabkan berlebih-lebihan pada mentaqdiskan manusia dan mengambil berkat terhadapnya, dan meminta dekat dengan Allah dengan menziarahi orang-orang ini; ia juga natijah dari banyaknya bid'ah yang bukan daripada agama. Terlebih ketara bid'ah-bid'ah ini pada musim-musim keagamaan dan amalan-amalan agama.

Imam Abu Zahrah kemudiannya memperincikan beberapa kritikan terhadap Wahhabiyah:⁷

1. Wahhabi berkembang melalui kekuatan senjata:

Imam Abu Zahrah berkata:

أن الوهابية لم تقتصر على الدعوة المجردة، بل عمدت إلى حمل السيف لمحاربة المخالفين لهم باعتبار أنهم يحاربون البدع، وهي منكر تجب محاربتة

Bermaksud: *Sesungguhnya al-Wahabiyyah tidak hanya menggunakan dakwah semata-mata, sebaliknya sengaja mengangkat senjata untuk memerangi orang-orang yang menentang di atas alasan memerangi 'bid'ah', iaitu mungkar yang wajib diperangi.*

Beliau berkata lagi: *Muhammad bin Sa'ud (datuk keluarga Saudi sekarang) memimpin fikrah wahhabiyyah dalam peperangan, iaitu besan kepada kepada Sheikh Muhammad Abdul Wahhab yang menganuti mazhabnya dan amat ekstrem kepada kefahamannya. Dia memulakan usaha menggunakan kekuatan senjata dan mengisytiharkan bahawasanya dia mahu menegakkan sunnah dan mematikan bid'ah.*

2. Wahhabi meruntuhkan masjid yang ada kubur-kubur.

Imam Abu Zahrah berkata:

أنها كانت كلما مكن لها من قرية أو مدينة أتت على الأضرحة هدمًا وتخريبًا..... ولكن يظهر أنهم كانوا يهدمون المسجد مع الضريح أخذًا من الخبر الذي استنكر فيه النبي صلى الله عليه وسلم عمل بني إسرائيل إذ اتخذوا من قبور أنبيائهم مساجد

Bermaksud: *Sesungguhnya mereka, apabila menguasai sesuatu kampung atau Bandar, mereka ke kubur-kubur lantas meruntuhkannya dan merosakkannya.....telah zahir adalah mereka mmeruntuhkan masjid yang ada kubur dengan berpandukan satu khabar (hadith) yang menunjukkan Nabi SAW menyanggah amalan Bani Israel yang menjadi kubur para nabi sebagai masjid.*

3. Wahhabi memusnahkan kubur-kubur sahabat

Imam Abu Zahrah mengatakan lagi: Mereka bukan setakat itu sahaja, mereka pergi ke kubur yang kelihatan dan membinasakannya iaitu ketika mana mereka mendapat

⁷ Abu Zahrah, Muhammad (1996). *Tarikh al-Mazahib al-Islamiah*. Kaherah: Dar al-Fikr al-'Arabi. h. 212-214.

kuasa di Tanah Hijaz, mereka membinasakan kubur-kubur Sahabat dan meratakannya setara bumi. Kini tidak ada lagi kubur-kubur tersebut kecuali papan tanda yang menunjukkan tempat kubur. Mereka membenarkan menziarahi kubur, tetapi hanya setakat ziarah untuk mengucapkan selamat pada empunya kibur. Orang yang menziarahi mengatakan: "As-salamu 'alaik".

4. Wahhabi terikat dengan perkara-perkara kecil.

Wahhabi amat terikat dengan perkara-perkara kecil yang tiada pun penyembahan atau unsur-unsur penyembahan dan mengisytiharkan menyanggahnya, umpamanya gambar fotografi. Kita boleh dapat dari fatwa-fatwa mereka dan bukubuku kecil tulisan ulama-ulama mereka. Namun pemimpin-pemimpin mereka tidak peduli pun pandangan ini dan melontarkannya ke dinding.

5. Wahhabi memperluaskan makna bid'ah kepada makna yang amat luas dan pelik.

Mereka memperluaskan makna bid'ah kepada makna yang amat luas dan pelik sehingga mereka mengatakan meletakkan tabir di Raudhah Syarifah sebagai perkara bid'ah. Justeru, mereka melarang mempebaharui tabir tersebut

6. Hanya Wahhabi yang benar.

Ulama Wahhabi mendakwa pandanganyalah yang 'benar', yang tidak menerima 'salah'. Manakala pandangan orang lain adalah 'salah', tidak mengandungi 'kebenaran'. Bahka mereka mengatakan, perbuatan orang lain mendirikan kubur dan mengelilinginya sebagai hampir kepada penyembahan, di sini mereka seperti Khawarij yang mengkafirkan orang lain dan memerangi mereka.

Menurut Imam Abu Zahrah lagi: Pandangan-pandangan Wahhabi ini tidak merbahaya pada ketika mereka di padang pasir, namun mereka bercampur dengan orang lain apabila keluarga Saoud menguasai Hijaz maka ia adalah sesuatu yang merbahaya.

Namun, Raja Terdahulu, Abdul Aziz Al Saud telah berdepan perkara ini dan hanya menjadikan pandangan ini hanya untuk mereka dan bukan untuk selain dari mereka, dan berjalan usahanya dan langkahnya yang agak ke depan sehingga dia mengarahkan pembuatan tabir al-Raudhah sebagai ganti tabir yang telah reput, namun dia menanggungkan peletakan tabir baru ini sehingga tamatnya pembaikan Masjid Nabawi dan beliau mati sebelum melakukannya. Semoga penggantinya meneruskan usahanya.

Daripada maklumat yang diterima, Raja Abdullah Abd al-'Aziz yang memerintah kerajaan Arab Saudi sekarang, telah melantik ulama Ahlussunah wal Jamaah yang beraliran Asyairah untuk menyertai Majlis Fatwa mereka. Ini menggambarkan sudah terdapat keterbukaan Kerajaan Arab Saudi mengenai perkara ini.

4.0 Pandangan 'mujamalah' (Kelihatan menyokong tetapi menyanggah hampir kesemua pandangan)

Sebagaimana yang penulis nyatakan di awal artikel ini, terdapat ramai ulama yang menggunakan 'konsep mujamalah'. Mereka memuji Sheikh Muhammad Abd al-

Wahhab sebagai al-muslih secara nyata, namun mereka menghuraikan kemudiannya kebatilan pandangan tersebut satu persatu.

Penulisan ini cuba menelusuri Prof Dr Wahbah Zuhayli yang menggunakan uslub ini dalam kitabnya al-Bida' al-Munkarah:

إنني منذ البدء مع اتجاه أهل السنة كالإمام النووي وغيره، ومنها إصلاحات المصلح الشيخ محمد بن عبد الوهاب رحمه الله، للحيلولة بين الانحراف وبين العوام الذين يمارسون طقوسا شاذة، أو تصدر عنهم عبارات غير صحيحة ولا لائقة، كالطلب من الأموات الصلحاء أو الأولياء تحقيق رغبة أو منع ضرر.... إلخ.⁸

Bermaksud: *Sesungguhnya aku semenjak dahulu bersama-sama pembawaan ulama Ahlussunnah seperti al-Imam al-Nawawi dan selainnya. Antaranya 'islah-islah' seorang Muslih iaitu Muhammad bin Abd al-Wahhab Rahimahullah, untuk menghalang antara 'kesesatan' dan 'orang-orang awam' yang mengamalkan bentuk ibadah yang ganjil. Atau keluar daripada mereka perkataan yang tidak benar dan tidak sepatutnya, seperti meminta dari jenazah orang-orang Soleh dan wali-wali samada untuk memenuhi hajat atau menghalang bahaya....*

Beliau berkata lagi:

وإنني أيضا مع السلفية في تنزيه الله تعالى، ولكنني لست مع الأحد في الأسلوب المنفر والاثام السريع بالكفر والضلال أو وصف إنسان بالقبوري (أي عابد القبر) لمجرد زيارة القبور التي هي سنة ثابتة.

Bermaksud: *Sesungguhnya aku bersama-sama al-Salafiyyah pada mensucikan Allah Taala, namun bukanlah aku bersama-sama dengan seseorang yang menggunakan cara yang menyebabkan masyarakat lari, atau cepat membuat tuduhan kafir, sesat, atau menggelarkan seseorang dengan quburi (penyembah kubur) apabila dia menziarahi kubur, walhal amalan tersebut merupakan sunnah yang thabit.*

Beliau berkata lagi:

ومن تأول بعض صفات الله لا يكفر كتأويل وجه الله بأنه كناية أو مجاز عن الله تعالى، فذلك أسلوب عربي معروف، وتأويل اليد بالقدرة، ونحو ذلك مما يتقبله العقل، لأن كلا من السلف والخلف ينزّهون الخالق عن مشابهة الحوادث وإن كان الأسلم الإيمان بالصفات الحسنی لله تعالى من غير تشبيهه، ولا تعطيل ولا تأويل.

Bermaksud: *Sesiapa yang mentakwilkan sebahagian sifat-sifat Allah, tidak kufur seperti mentakwilkan 'wajhullah', kerana ia adalah 'kinayah' atau 'majaz' terhadap Allah SWT. Itu adalah uslub bahara Arab yang terkenal. Maka ditakwilkan 'al-yad' dengan 'al-qudrah', dan selainnya yang aqal boleh menerimanya, kerana kesemua al-Salaf dan al-Khalaf mensucikan Pencipta (al-Khaliq) dari menyerupai perkara baru. Walaupun yang paling selamat ialah berimannya dengan asma' Allah Taala al-husna tanpa tasybih, tanpa ta'til dan tanpa ta'wil.*

Selepas itu, beliau membahaskan satu persatu isu yang dikatakan bid'ah dan di bawah ini ringkasan pandangannya:

⁸ Al-Zuhayli, Wahbah (1999). *Al-Bida' al-Munkarah*, Dah.yik: Dal al-Maktabi. h.8.

Isu-isu	Pandangan Dr Wahbah al-Zuhayli	
<p>Takwil sifat Allah SWT⁹</p>	<p>مذهب السلف: إثبات صفات الباري بمعان تليق بذاته تعالى، فنؤمن بأسماء الله وصفاته الحسنى على مراد الله، مفوضين كيفيتها إلى الله تعالى</p> <p>مذهب الخلف: تأويل هذه الصفات بحسب ما يليق بكماله تعالى، وهذا أوفق وأحكم عقلاً.</p> <p>والفريقان متفقان على تنزيه الله تعالى عن مشابهة الحوادث، أو عن التشبيه والكيف والتجسيم. والمذهب الحق: إنما هو التوحيد، دون التشبيه والتجسيم، فلا مبالغة في التأويل، لأن ذلك يؤدي إلى التعطيل، ولا مبالغة في الإثبات الظاهري، لأن ذلك يؤدي إلى التجسيم. والتوسط في ذلك: هو إقرار الصفة، مع اعتقادنا أن لها تأويلاً استأثر الله بعلمه مع تنزيه اعتقادنا عن التشبيه والتعطيل، وهذا هو مذهب السلف، فيصير الخلاف لفظياً.</p>	<p>Mazhab al-Salaf: Mengithbatkan sifat al-Bari (Allah SWT) dengan makna yang layak dengan Zat-Nya Taala, maka kita beriman dengan nama-nama Allah dan sifat-sifat al-husna tersebut mengikut kehendak Allah SWT. Dan tafwidhkan (serahkan) bagaimana (kaifah) kepada Allah SWT.</p> <p>Mazhab al-Khalaf: Mentakwilkan sifat-sifat ini mengikut apa yang layak untuk kesempurnaan Allah SWT, dan ini lebih benar dan lebih tetap secara aqalnya.</p> <p>Kedua-dua kumpulan bersepakat pada mensucikan Allah SWT dari menyerupai makhluk, atau dari tasybih, atau dari al-kaif dan dari tajsim: Mazhab yang haqialahbertauhid tanpa tasybih dan tajsim. Tidak berlebih-lebihan pada takwil, kerana ia boleh membawa kepada ta'til, dan tidak berlebih-lebihan pada menetapkan makna zahir, kerana ia boleh membawa kepada tajsim. Dan pertengahan pada perkara tersebut ialah mengiqrarkan sifat dengan berkeyakinan pada nya hanya Allah sahaja yang mengetahui berserta mensucikan keyakinan kita dari tasybih dan ta'til. Maka inilah mazhab al-Salah, maka jadilah khilaf (dengan khalaf) secara lafzi zahaja.</p>
<p>Penambahan dalam Tasauf دخائل في التصوف</p>	<p>والمتصوفة المخلصون يعنون بذكر الله سرا وجهرا، ولا مانع من ذلك لأن علماء الإسلام قرروا أفضلية الجهر بالذكر إذا خلا من الرياء، أو إيذاء مصل أو قارئ أو نائم.</p> <p>فإن التزم المتصوفة ما جاء في القرآن والسنة، فلا اعتراض عليهم، وأما إن تغالى بعضهم، فقال بفكرة وحدة الوجود (أو الحلول والاتحاد) بمعنى أن الله تعالى قد حل في جميع أجزاء الكون، أو بمعنى أن المخلوق عين الخالق، أو استغرق في بعض الشطحات المكفرة بأنه هو الله أو</p>	<p>Orang-orang Tasauf yang ikhlas mementingkan zikrullah sama ada secara senyap mahupun jahar. Tidak ada halangan pada perkara tersebut kerana para ulama Islam menetapkan kelebihan zikir secara al-jahr sekiranya tiada riyak. Atau mengacau orang yang bersolat, atau orang yang tidur.</p> <p>Sekiranya orang tasauf itu beriltizam dengan al-Quran dan sunnah, maka tidak dibantah ke atas mereka. Namun apabila sebahagian mereka berlebih-lebihan (ghuluw), dengan mengatakan wehdah al-wujud (al-hulul atau al-ilhad), iaitu Allah Taala telah menjelma pada setiap bahagian ala mini, atau</p>

⁹ Al-Zuhayli, Wahbah (1999), h.23-24.

	الحق، أو شوه مبدأ التوحيد، أو قال بإسقاط الفرائض، فهذا لا شك ضلال وكفر صريح يخالف عقائد الأمة الإسلامية.	dengan makna 'makhluk itulah al-khaliq', atau tenggelam dalam sebahagian 'kegelinciran yang menyebabkan kekufuran' seperti 'Dia adalah Allah atau al-haq', atau 'memburukkan pegangan tauhid', atau mengatakan 'diangkat perkara fardhu darinya', maka ini, tanpa ragu-ragu, adalah sesat dan kufur nyata, bertentangan dengan aqidah umat Islam.
Menyeru الاستغاثة بغير الله		Tidak boleh beristighathat dengan orang yang telah mati atau yang tiada di sisi. ¹⁰
Tabarruk dengan para orang-orang Soleh ketika mereka hidup		Tidak ada halangan bertabarruk dengan orang soleh dengan meminta doa atau berubat, namun ulama khilaf pada perkara 'bertabarruk' pada 'individu orang-orang soleh (sentuhan dan sebagainya), dan tidaklah ianya dari perkara 'bid'ah munkarah' ¹¹
Baca 'basmalah' dengan 'jahar'.		Perkara khilaf dan bukan bid'ah munkarah. ¹²
Qunut solat subuh		Tidak betul mengatakannya 'bid'ah'. ¹³
Mayat mendapat faedah dari bacaan al-Quran		Mayat mendapat faedah dari bacaan orang lain. ¹⁴
Bertawassul dengan Nabi SAW		Membenarkan tawassul dengan Nabi SAW secara umum (ketika hidup dan mati).
Menziarahi kubur Nabi SAW		Ini masalah khilafiah, tidak boleh digelar sebagai bid'ah. Jumhur ulama membenarkan kecuali Ibn Taymiyyah.
Berdoa secara berjemaah, dan majlis zikir.		Tidak boleh mengatakan bid'ah pada zikir berjemaah selepas solat di masjid dan selainnya. Yang haqnya meninggikan suara dengan berzikir dalam keadaan tidak mendatangkan 'kekacauan/ keraguan, maka berhalaqah untuk zikir adalah tidak salah. ¹⁵

¹⁰ h. 31-32.

¹¹ h. 33.

¹² h.36-38.

¹³ h. 38-39.

¹⁴ h.39-41.

¹⁵ h.48.

5.0 ISU-ISU YANG TELAH DAN AKAN TERUS MENGUNDANG FITNAH

Pada pengamatan penulis, terdapat isu-isu yang akan berterusan menerjah pemikiran umat, sama ada pendokong mahupun penentang Gerakan Najdiyyin ini. Antara perkara-perkara tersebut.

1. Kata Sheikh Muhammad Abd al-Wahhab dalam kitabnya, Kasy al-Syubuhat:



Bermaksud: *Fasal Ketiga: Menerangkan peng-esa-an ibadah ialah makna 'La Ilaha Illallah', sesungguhnya orang-orang kafir pada zaman Nabi SAW adalah lebih mengetahui akan maknanya daripada orang-orang yang mendakwa beragama Islam di zaman kita.*

Tauhid ialah makna katamu: 'La Ilaha illah'. Adalah 'ilah' pada pandangan mereka (orang-orang kuffar tersebut): Semua perkara yang dimaksudkan untuk perkara-perkara berikut, sama ada malaikat, atau nabi, atau wali, atau pokok, atau kubur, atau jin. Mereka tidak bermaksud (mempertikaikan) bahasawanya Dia (Allah) maha pencipta, pemberi rezeki, pentadbir kerana mereka mengetahui bahawasanya kesemuanya itu untuk Allah semata-mata, sebagaimana aku katakan kepadamu.


Hanyasanya, yang mereka (orang-orang kafir) maksudkan dengan al-ilah: Apa yang dimaksudkan oleh 'para musyrikin' di zaman kita dengan lafaz 'syyid'. Maka telah datang Nabi SAW kepada mereka (orang-orang Kafir) menyeru kepada kalimah Tauhid.

Perhatikan beberapa pandangan Sheikh Muhammad Abd al-Wahhab"

1. Mereka tidak bermaksud (mempertikaikan) bahawasanya Dia (Allah) maha pencipta, pemberi rezeki, pentadbir kerana **mereka mengetahui bahawasanya kesemuanya itu untuk Allah semata-mata, sebagaimana aku katakan kepadamu.**
2. Hanyasanya, yang mereka (orang-orang kafir) maksudkan dengan al-ilah: **Apa yang dimaksudkan oleh 'para musyrikin' di zaman kita dengan lafaz 'sayyid'.**

Ini yang membawa fitnah iaitu 'menjadikan sesuatu sebagai tuan' itu sama darjat sahaja dengan kuffar. Dilaksanakan fahaman ini pada tawassul, tabarruk dan istighathat.

2. Kata-kata ulama yang menjadi antara rujukan utama aliran Najdiyyin ialah Dr Saleh bin Fauzan dalam kitabnya al-Irsyad Ila Sahih al-I'tiqad:



Bermaksud: *Bahagian ini, telah mengingkarinya (inkari ayat-ayat sifat) firqah al-Jahmiyyah dan anak-anak murid mereka iaitu al-Mu'tazilah dan Asyairah.*

Siapa firqah al-Jahmiyyah? Menurut al-Imam Abd al-Qahir bin Tahir al-Baghdadi (wafat 429H) mengatakan:¹⁶

¹⁶ Al-Baghdadi, Abd al-Qahir bin Tahir bin Muhammad. (2005) *Al-Farq baina al-Firqah*. Beirut: Dar al-Kutub al-'Ilmiyyah. h. 158, 159.

الجهمية: أتباع جهم بن صفوان الذي قال بالإجبار والاطرار إلى الأعمال، وأنكر الاستطاعات كلها، وزعم أن الجنة والنار تبيدان وتفنيان.....وزعم أيضا أن علم الله تعالى حادث، وامتنع من وصف الله تعالى بأنه شيء أو حي أو عالم، أو مرید.....

Al-Jahmiyyah: Pengikut Jahm bin Safwan yang berpegang kepada manusia tergagah dan terpaksa dalam amaln mereka (tiada upaya) dan mengingkari usaha keseluruhannya, dan mendakwa syurga dan neraka pupus dan hancur.....dan mendakwa juga bahawasanya ilmu Allah SWT baharu, dan dia melarang dari menyifatkan Allah dengan sesuatuK atau hidup, atau berilmu, atau berkehendak....

Justeru, Dr Saleh Fauzan memasukkan Asyairah dan pengikut ke dalam golongan ini! Lihat apa kata-kata Imam al-Baghdadi terhadap al-Jahmiyyah:

وأكفره أصحابنا في جميع ضلالتة التي ذكرنا- يحمل السلاح على السلطان، وخرج مع سريج بن الحارث على نصر بن سيار، وقتله سلم بن أحوز المازني في آخر زمان بني مروان، وأتباعه اليوم بنهاوند، وخرج إليهم في زماننا إسماعيل بن إبراهيم بن كبوس الشيرازي الديلي، فدعاهم إلى مذهب شيخنا أبي الحسن الأشعري، فأجابه قوم منهم، وصاروا مع أهل السنة يدا واحدة، والحمد لله رب العالمين.

Sahabat-sahabat kami mengkafirkannya (Jahm bin Safwan) pada kesemua kesesatan mereka yang kami sebutkan- mereka mengangkat senjata ke atas Sultan- Dia menentang bersama-sama Suraij bin al-Harith terhadap Nasr bin Sayyar. Salim bin Ahwar al-Mazini membunuhnya pada akhir pemerintahan Bani Marwan. Pengikutnya sekarang (zaman al-Baghdadi) di Nahrawand. Telah pergi kepada mereka pada zaman ini, Ismail bin Ibrahim bin Kabus al-Syirazi al-Dili, dan beliau menyeru mereka kepada mazhab Sheikh kami Abu Hassan al-Asy'ari dan telah bersetuju sebahagian mereka dan telah menjadi mereka ahlussunnah dalam satu kesatuan, segala puji bagi Allah.

Jadi, apabila ulama ahlussunnah mengkafirkan al-Jahmiyyah, seolah-olah Asyairah juga termasuk yang dikafirkan oleh mereka. Walhal Imam al-Baghdadi berkata pula diempat baris terbawah nukilan tersebut: Telah pergi kepada mereka pada zaman ini, Ismail bin Ibrahim bin Kabus al-Syirazi al-Dili, dan beliau menyeru mereka kepada mazhab Sheikh kami Abu Hassan al-Asy'ari dan telah bersetuju sebahagian mereka dan telah menjadi mereka ahlussunnah dalam satu kesatuan, segala puji bagi Allah.

Imam al-Baghdadi dengan jelas mengatakan Sheikhnya adalah al-Imam Abu Hassan al-Asy'ari dan mereka adalah ahlussunnah!

وينفون عنه ما نفاه عن نفسه، وينكرون على من يخالف هذا المنهج.

فقد روى عبدالرزاق عن معمر عن ابن طاوس عن أبيه عن ابن عباس رضي الله عنهما، أنه رأى رجلاً انتفض لما سمع حديثاً عن النبي ﷺ في الصفات؛ استنكاراً لذلك، فقال: (ما فرق هؤلاء؟! يجدون رقة عند محكمه، ويهلكون عند متشابهه)^(١) يشير رضي الله عنه إلى أناس يحضرون مجلسه من عامة الناس بأنهم إذا سمعوا شيئاً من نصوص الصفات وهي من المحكم حصل معهم فرق - أي: خوف - وانتفضوا كالمنكرين لها، فهم كالذين قال الله فيهم: ﴿فَأَمَّا الَّذِينَ فِي قُلُوبِهِمْ زَيْجٌ فَيَتَّبِعُونَ مَا تَشَبَهَ مِنْهُ ابْتِغَاءَ الْفِتْنَةِ وَابْتِغَاءَ تَأْوِيلِهِ﴾^(٢) فَيَدْعُونَ الْمُحْكَمَ، ويتبعون المتشابه، ويؤمنون ببعض الكتاب، ويكفرون ببعض.

ونصوص الصفات من المحكم لا من المتشابه يقرؤها المسلمون ويتدارسونها، ويفهمون معناها، ولا ينكرون منها شيئاً.

قال وكيع: (أدركنا الأعمش وسفيان يحدثون بهذه الأحاديث يعني: أحاديث الصفات - ولا ينكرونها) انتهى.

وإنما ينكرها المبتدعة من الجهمية والمعتزلة والأشاعرة الذين ساروا على منهج مشركي قريش الذين يكفرون بالرحمن، ويلحدون


(١) كتاب [الجامع] لمعمر بن راشد، الملحق بكتاب [المصنف] لعبدالرزاق تحقيق حبيب الرحمن الأعظمي (٤٢٩/١١) برقم (٢٠٨٩٥) الناشر/ المكتب الإسلامي بيروت.
(٢) سورة آل عمران، الآية ٧.

Bahawasanya: Hanyasanya, telah mengingkarinya para pembuat bid'ah daripada al-Jahmiyyah dan al-Mu'tazilah dan al-'Asyairah yang mana mereka berjalan atas jalan para musyrikin Quraisy Mekah yang kufur terhadap al-Rahman.

Kalau fatwa-fatwa ini dipegang secara taksub, maka terbukti mereka mengklasifikasikan ulama Ahlussunnah yang mengikut penafsiran Asyairah adalah sesat. Bukan setakat sesat, tapi setaraf dengan para musyrikin.

Selain itu, apabila kita membuka kitab-kitab tabaqat, kita tidak akan berjumpa dengan penulis sejarah ulama-ulama yang menklasifikasikan seseorang sebagai al-Asy'ari al-Jahmi. Namun, Dr Salleh Fauzan telah membuat pengklasifisian nyata dengan mengelompokkan Asyairah dalam firqah yang sesat dan musyrik. Semoga Allah SWT ampunkan dosanya.

3. Kata-kata Sheikh Muhammad Salih Uthaimin yang menjadi rujukan aliran Najdiyyin:



Apabila Sheikh Muhammad Salih Uthaimin ditanya adakah al-Nawawi dan Ibn hajar sama ada boleh menjadikan mereka dari golongan Ahlussunnah wal Jamaah? Dia menjawab: *Pada apa yang mereka berpegang pada masalah al-Asma' dan al-Sifat, mereka berdua BUKAN dari Ahlussunnah wal Jamaah!*¹⁷

Kenyataan dan fatwa sebegini akan berterusan menjadi fitnah di kalangan umat Islam. Sekiranya Imam besar tersebut dengan mudah dikeluarkan dari golongan Ahlussunnah, apatah lagi Mufti-mufti, tok-tok guru, ustaz-ustaz yang ada di negara kita!

4. Rasional boleh menggunakan kekerasan dalam menghapuskan perkara yang 'dikatakan bid'ah'.

Apabila mempertahankan pandangan Sheikh Muhammad Abd al-Wahhab menggunakan kuasa memerangi perkara yang dikatakan 'bid'ah,, seorang penulis berkata:¹⁸

¹⁷ Muhammad Salih Uthaimin (t.t). *Liqa' al-Bab al-Maftuh*. (t.t): Dar al-Watan li al-Nasyr. h.42-43.

¹⁸ Azwira Abdul Aziz (2006) *Siapakah Ahli Sunnah Yang Sebenar?*. Johor Bharu: Penerbitan Jahabersa. h.163-165.

Dalam menjelaskan maksud hadith ini (hadith boleh memerangi mereka yang engkar membayar zakat), an-Nawawi rahimahullah memetik kata-kata al-Khattabi RH:

Maksudnya: (Teguran) daripada 'Umar RA ini kerana (dia) bergantung kepada zahir sabda (Nabi SAW) dan sebelum (dia) memerhatikan syarat-syaratnya.

Kemudian al-Nawawi berkata: Maksudnya: Tidak dapat tidak, bersama (ucapan syahadah) ini mesti beriman dengan semua perkara yang di bawa oleh Nabi SAW sebagaimana ia datang dalam riwayat yang lain oleh Abi Hurairah.

Apa yang dapat difahami daripada hadith Abu Malik al-Asyja'ie, kata-kata Abu Bakr dan para ulama di atas ialah, bahawa ucapan syahadah hanya boleh menjamin keselamatan nyawa dan harta sekiranya tidak dilakukan perkara-perkara yang boleh membatalkannya. Sebaliknya jika dilakukan perkara-perkara yang boleh membatalkan syahadah itu, maka tiada lagi jaminan keselamatan nyawa dan harta. Tafsiran ini dapat difahami dengan jelas melalui sabda Nabi SAW:

Maksudnya: Maka terselamatlah nyawa dan hartanya melainkan dengan haknya.

Tafsiran para ulama ini dilihat sama dengan pengangan Muhammad Ibn Abd al-Wahhab.

Atas keyakinan itulah, beberapa tindakan dilakukan untuk mengaplikasikan menegakkan al-amr bil ma'ruf wa al-nahyu 'an al-munkar pada 'perkara-perkara yang dikatakan bid'ah.

Menurut Muhammad Abdul Qadeer al-Mandeely, pada tahun 1158H, Muhammad Abd al-Wahhab telah pergi ke Dar'iah dan menjadi tetamu bagi Abdul Rahman bin Suwailim dan Ahmad b. Suwailim. Semasa di sana beliau dikunjungi oleh orang ramai untuk mempelajari dan mempelajari ilmu agama darinya. Kemudian beliau telah bersetuju dengan Muhammad b Sa'ud Amir Dar'iah untuk berjuang berjihad di jalan Allah bagi melaksanakan tuntutan 'amar al-ma'ruf dan nahi munkar' serta menegakkan syariat agama Islam.¹⁹

Antara tindakannya:²⁰

- i. Berusaha keras melarang umat Islam daripada menziarahi Maqam Nabi SAW.
- ii. Melarang orang ramai berselawat ke atas Nabi SAW secara kekerasan.
- iii. Menempelak dan mencaci pendapat imam mazhab yang empat.
- iv. Memusnahkan mimbar-mimbar yang dikhususkan bagi setiap mazhab dan tempat-tempat pengajian di Mekah.
- v. Menghina dan menyesatkan ulama.
- vi. Mengkafirkan ahli Sufi, Tariqat dan Asya'irah.
- vii. Mengkhianati kitab-kitab karangan ulama dengan menokok tambah kandungan kitab yang asal dan membuang mana-mana kandungan yang tidak sesuai dengan prinsip mereka.

¹⁹ Abdul Qadeer al-Mandeely (1994), h. 79.

²⁰ Muhammad Fuad Kamaluddin, h. 74-97.

Kesimpulannya, aliran ini telah meletakkan 'ijtihad' mereka bahawa 'sesuatu itu bid'ah' setara dan setaraf dengan ijtihad Sayyidina Abu Bakar al-Siddiq yang memutuskan 'boleh memerangi mereka yang enggan membayar zakat'. Justeru, perkara bid'ah ini perlu juga diperangi secara kekerasan sekiranya mempunyai kekuasaan.

5. Perbuatan mengubah kandungan kitab ulama silam.

Sudah kedapatan usaha mengubah kandungan kitab-kitab ulama silam. Perkara ini sudah diperkatakan oleh ramai ilmuwan khususnya kitab 'al-Ibanah fi Usul al-Diyanah' karangan Imam Abu Hassan al-'Asy'ari dan banyak kitab-kitab lain. Ini menyebabkan penulis lebih menggemari 'cetakan lama' untuk memastikan perkara tersebut tidak berlaku. Rupa-rupanya 'usaha tadlis dan tasywih' yang berlaku dalam hadith-hadith nabi, berlaku semula dalam kitab-kitab ulama.

Penulis memetik penulisan Sheikh Muhammad Fuad yang berjaya mendokumenkan perkara ini bagi mengelak ianya sebagai tuduhan tanpa asas. Antara petikannya ialah²¹:

Sebagai bukti dakwaan ini, guru kami al-Muhaddith al-Musnid Mahmud Sa'id Mahduh menyatakan di dalam kitab Raf'ul Minarah, bahawa sebahagian dari pihak yang tidak bertanggungjawab telah melakukan pengkhianatan terhadap kitab al-Azkar karangan Imam al-Nawawi yang ditahqiq oleh Syeikh Abdul Qadir Arnaut. Mereka telah menyebarkan kitab ini setelah membuang kisah al-'Utbi yang terdapat di dalam cetakan asal. Kitab ini dicetak oleh Percetakan Dar al-Huda di Riyadh pada 1409H.

Mereka telah memadamkan terus kisah al-'Utbi RA yang menceritakan, ketika Imam al-'Utbi sedang duduk di sisi maqam Nabi SAW, maka datang seorang Arab Dusun lalu berkata: Salam sejahtera ke atasmu, wahai Rasulullah SAW! Aku mendengar Allah SWT berfirman:

*ولو أنهم إذ ظلموا أنفسهم جاءوك فاستغفروا الله واستغفر لهم الرسول لوجدوا الله توابا رحيمًا
Seandainya mereka telah menganiaya diri mereka (membuat dosa), lalu mereka datang kepadamu (Nabi Muhammad SAW) dan memohon keampunan kepada Allah dan Rasul juga memohon keampunan bagi mereka, nescaya mereka akan mendapati Allah Yang Maha Pengampun lagi Maha Mengasihani. (al-Nisa': 64).*

"Sesungguhnya aku datang kepadamu kerana memohon keampunan daripada segala dosaku, dan mengharap syafa'atmu kepada Tuhanku, wahai Rasulullah!"

Setelah itu, dia mendendangkan beberapa bait syair:

*يا خيرَ من دُفِنَتْ بالقاعِ أعظمُهُ * * فطابَ من طيِّبهنَّ القاعُ والأكمُ * * نَفْسِي الْفِدَاءُ لِقَبْرِ أَنْتِ
سَاكِنُهُ * * فِيهِ الْعَقَافُ وَفِيهِ الْجُودُ وَالكَرَمُ*

"Wahai penghuni kuburan yang tulang belulanganya di tanah yang suci ini, kerana kandungannya yang baik, tanah dan bukitnya juga dipuji-puji; jiwaku bersedia berkorban terhadap siapa yang mendiami kuburan ini. Yang bersifat bersih diri, murah hati lagi dihormati!"

²¹ h. 94-100.

Berkata al-'Utbi: "Kemudian orang Arab Dusun tersebut beredar dari situ. Peristiwa tersebut terbawa-bawa dalam tidurku lali aku bermimpi melihat Nabi SAW berkata kepadaku: "Wahai 'Utbi! Dapatkan lelaki itu dan sampaikan berita gembira kepadanya

Mereka bukan sahaja membuang kisah tersebut, malah telah memasukkan fakta yang diselewengkan daripada fakta asal. Mereka telah menukar fakta asal, sebagaimana yang ditulis oleh Imam Nawawi di dalam kitab al-Azkar dan memasukkan 'Fasal pada menziarahi kubur Nabi SAW.

Syeikh Mamduh Sa'id Mamduh menyatakan, beliau menyangka bahawa pentahqiq kitab iaitu Syeikh Abdul Qadir Arnaut yang telah melakukan penyelewengan. Untuk mendapatkan kepastian, beliau menemui anak Syeikh Abdul Qadir yang bernama Mahmud di Dubai. Tetapi beliau menafikan bahawa penyelewengan tersebut dilakukan oleh bapanya. Syeikh Abdul Qadir sendiri mengeluarkan surat akuannya menafikan penyelewengan yang tidak dilakukannya. Antara kandungan surat tersebut:

"Penyelewengan yang berlaku di dalam kitab ini bukanlah datang daripada saya selaku Hamba Allah yang Faqir kepada AllahYang Maha Tinggi lagi Berkuasa. Ia bukan dilakukan oleh pemilik Darul Huda, Ustaz Ahmad al-Nuhas tetapi dilakukan oleh Hal Ehwal Kawalan Percetakan" (Tamat nukilan).

Pada pandangan penulis, bahayanya usaha penipuan ini ialah, hanya mereka yang mempelajari kitab-kitab ulama silam yang mampu mengenal kepalsuan tersebut, namun bagaimana pula masyarakat awam dan mereka yang taksub pada penghujahan aliran ini? Pada saya ini adalah pengkhianatan besar terhadap tamadun ummah dan turathnya!

6.0 KESIMPULAN

Sukar untuk penulis membuat kesimpulan terhadap Sheikh Muhammad Abd al-Wahhab dan gerakan yang mendokong pemikirannya. Dari satu sudut, kitab-kitabnya menunjukkan kekerasan pegangan sehingga boleh menyesatkan dan menggunakan kekerasan kuasa terhadap pihak lain. Namun, dalam masa yang sama didatangkan kata-katanya dalam 'al-maqallat' nya seolah-olah beliau menafikan beliau menyesatkan, atau mengkafir kaum Muslimin.

Demikian juga di kalangan pendokong gerakannya di tanah air kita kerap di dengar menyesatkan bahkan mengkafirkan pihak yang bertentangan, namun dalam masa yang sama mereka menafikan menyesatkan dan mengkafirkan orang lain!

Namun, kata-kata ulama-ulama aliran ini yang datang selepasnya seperti Sheikh Uthaimin dan Sheikh Fauzan, dengan jelas mengeluarkan ulama-ulama besar dari golongan Ahlussunnah wal Jamaah!

Saya hanya mampu mengatakan aliran Najdiyyin ini bertambah 'ghuluw' dan bercanggah dengan beberapa perkara pegangan Ahlussunah wal Jamaah, namun saya masih 'reserve' pandangan saya pada membalas semula tuduhan 'sesat' dan sebagainya yang mungkin dilemparkan kepada kita yang tidak sependapat dengannya.

Pada masyarakat umum, saya menyeru berpeganglah kepada huraian al-Imam Abd al-Qahir bin Tahir al-Baghdadi (wafat 429H) mengenai siapakah Ahlussunnah wal Jamaah dan 'gigitlah ianya dengan geraham-geraham kita sekuat-kuatnya' dan jangan dicampur dengan amalan-amalan yang ganjil yang sememangnya ditolak oleh seluruh ulama yang haq dalam Ahlussunnah wal Jamaah. Imam al-Baghdadi Rahimahullah memperincikan lapan golongan yang termasuk dalam Ahlussunnah wal Jamaah (lihat bukunya dari halaman 240-243):

- Golongan pertama, mereka yang menguasai ilmu khususnya dalam bab Tauhid (meng-esa-kan Allah) dan kenabian, hukum-hukum wa'ad (khabar gembira) dan wa'id (ancaman siksa), pahala dan balasan, syarat-syarat ijihad, pemerintahan dan kepimpinan. Mereka yang melalui jalan ini ialah ulama Kalam (Tauhid) yang bebas dari fahaman *tasybih* (menyerupakan sifat Allah dengan makhluk) dan bebas dari fahaman *ta'til* (yang menafikan sifat-sifat yang Azali bagi Allah SWT)), dan bebas dari bidaah al-Rafidhah, Khawarij, Jahmiah, Najariah dan seluruh pengikut bidaah dan hawa nafsu.
- Golongan kedua ialah imam-imam fiqh samada kumpulan yang cenderung pada *rakyun* (dalil aqal) atau hadith. Iaitu mereka yang beriktikad (berkeyakinan) pada perkara usuluddin dengan mazhab-mazhab sifat pada Allah dan pada sifat-sifatnya yang azali (membicarakan sifat-sifat Allah SWT sebagaimana sifat 20), dan mereka bebas dari fahaman Qadariah dan Muktaizilah; mereka menetapkan melihat Allah Taala dengan mata (di akhirat kelak) dengan mata tanpa *tasybih* (menyerupakan Allah dengan makhluk), tanpa *ta'til* (menafikan sifat-sifat Allah).

Termasuk dalam golongan ini ialah murid-murid kepada Malik, al-Shafie, al-Auza'i, al-Thauri, Abu hanifah, Ibn Abu Laila (wafat148H), sahabat-sahabat Abu Thaur (wafat240H), sahabat-sahabat Ahmad bin Hanbal (wafat241H), ahli al-Zahir, keseluruhan ulama fiqh yang beriktikad dalam bab-bab akal ini dengan prinsip-prinsip Sifat (tauhid yang membahaskan Sifat-sifat Allah). Dan mereka tidak mencampurkannya dengan apa-apa dari ahli bidaah dan hawa nafsu.

- Golongan ketiga ialah mereka yang menguasai ilmu-ilmu yang berkaitan dengan periwayatan hadith dan sunnah yang disampaikan oleh Nabi SAW, mereka berupaya membezakan antara sahih dan cacat antaranya, mengetahui sebab-sebab 'al-jarh wa al-ta'dil' (kredibiliti seorang rawi), dan mereka tidak memasukkan ilmu mereka dengan apa-apa dari ahli bidaah dan nafsu yang menyesatkan.
- Golongan ke empat ialah kaum yang menguasai kebanyakan topik-topik sastera Arab, nahu dan saraf. Mereka berada atas jalan pakar bahasa seperti al-Khalil (wafat175H), Abu 'Amr bin al-'Ala' (wafat 145), Sibawaih (wafat 180H), al-Farra' (wafat 207H), al-Akhfash (wafat 215H), al-Asma'i, al-Mazini (wafat 236H), Abu Ubaid (wafat 224H) dan seluruh imam-imam Nahu samada ulama-ulama Kufah atau Basrah, yang mana mereka tidak mencampurkan ilmu mereka dengan sesuatu dari bidaah al-Qadariah, atau Rafidhah atau Khawarij. Maka sekiranya seseorang itu cenderung ke arah nafsu yang menyesatkan, maka bukanlah ia dari golongan Ahlussunnah walaupun kata-katanya adalah 'hujah' dalam ilmu bahasa dan Nahu.
- Golongan ke lima, antaranya ialah mereka yang menguasai ilmu yang berkaitan dengan jenis-jenis qiraat untuk al-Quran, dan jenis-jenis tafsiran al-

Quran, penakwilannya berdasarkan mazhab-mazhab Ahlussunnah, tanpa berpegang dengan takwilan ahli nafsu yang sesat.

- Golongan ke enam ialah, antaranya ialah para ahli zuhud sufi yang mempunyai ilmu maka jauh pandangan, yang telah dinilai maka ia diiktibarkan, mereka redha dengan hidup yang ringkas, mereka mengetahui bahawa penglihatan, pendengaran dan hati dipertanggungjawabkan terhadap kebaikan dan kejahatan; menghisab dengan neraca zarah-zarah, justeru menyediakan diri mereka dengan sebaik-baik perisapan untuk hari Kiamat. Perkataan mereka berjalan di atas dua jalan iaitu secara jelas dan isyarat di atas jalan ahli hadis, tanpa mereka 'membeli' pandangan yang mempermainkan hadis. Mereka tidak melakukan kebaikan kerana riak, tidak pula meninggalkan kebaikan kerana malu kepada orang lain. Agama mereka hanya satu dan menafikan 'pentasybihan' (menyerupakan Allah dengan makhluk), mazhab mereka ialah tafwidh (menyerahkannya) kepada Allah SWT, bertawakkal kepadanya, penyerahan kepada-Nya, tenang dengan apa yang direzekikan-Nya.
- Golongan ke tujuh ialah, antaranya kaum yang terikat dengan barisan hadapan peperangan dengan orang-orang kafir, berjihad melawan musuh-musuh Islam, mereka menjadi benteng melindungi umat Islam, meninggalkan isteri-isteri mereka dan negara mereka, dan menzahirkan pada barisan hadapan mereka Mazhab ASWJ.
- Golongan ke lapan ialah, antaranya kebanyakan negara-negara yang secara kebiasaannya terdapat syiar ASWJ, bukannya negara yang menzahirkan syiar ahli hawa-nafsu yang sesat.

والله تعالى أعلم بالصواب، وصلى الله علي سيدنا محمد وعلى آله وصحبه أجمعين،
والحمد لله رب العالمين.

الفقير إلى الله،

أسمادي محمد نعيم يوسف
نزىل القدح.

Rujukan:

----- (2007). **Syeikh Muhammad bin Abdul Wahhab Antara Fakta dan Palsu** (Himpunan kertas kerja Seminar Antarabangsa Syeikh Muhammad bin Abdul Wahhab). Shah Alam: Karya Bestari.

_____, (1996). *Prosiding Seminar Akidah Ahlussunnah wa al-Jama'ah*. Kajang: Badan Perkhidmatan dan Penerangan Islam (BPPI).

_____, (1994). *Tokoh-Tokoh Islam* (Prosiding Seminar). Kajang: Badan Perkhidmatan dan Penerangan Islam (BPPI).

Abdul Qadeer al-Mandeely (1994). 'Syeikh Muhammad Abd. Wahhab dan dakwahnya' dalam *Tokoh-tokoh mujaddid Islam*. Kajang: Badan Perkhidmatan Penerangan Islam Selangor dan Wilayah Persekutuan (BPPI).

- Abu Zahrah, Muhammad (1996). *Tarikh al-Mazahib al-Islamiah*. Kaherah: Dar al-Fikr al-'Arabi.¹ Al-Zuhayli, Wahbah (1999). *Al-Bida' al-Munkarah*, Damsyik: Dal al-Maktabi.
- Al-Baghdadi, Abd al-Qahir bin Tahir bin Muhammad. (2005) *Al-Farq baina al-Firaq*. Beirut: Dar al-Kutub al-'Ilmiyyah.
- al-Sa'di Dr. Abd al-Malik: *al-Bid'ah fi al-Mafhum al-Islami al-Daqiq* (2008). Karak: Matba'ah al-Azhar.
- Al-Zuhayli, Wahbah (1999). *Al-Bida' al-Munkarah*, Damsyik: Dal al-Maktabi
- Azwira Abdul Aziz (2006) *Siapakah Ahli Sunnah Yang Sebenar?*. Johor Bharu: Penerbitan Jahabersa.
- Ibn Humaid al-Hanbali, Muhammad ibn Abdullah al-Najdi (t.t). *al-Suhub al-Wabilah 'ala Daroih al-Hanabilah*. (t.t): Maktabah al-Imam Ahmad.
- Ismail Lutfi Fathoni (2006). *Hakikat Ahli Sunnah wal Jama'ah dan Peranan Ulamaknya*. Kota Bharu: Jabatan Hal Ehwal Agama Islam Kelantan.
- Johari Mat et. all.(2006). *Ahlussunnah wal Jamaah Arus Perdana*. Kota Bharu: Dian Darulnaim Sdn. Bhd.
- Mohd Asri Zainul Abidin et.all.(2006). *Al-Imam al-Syafie Kegemilangan Ilmu dan Pemikiran (Himpunan Kertas Kerja Seminar)*. Shah Alam: Karya Bestari.
- Mohd Yaakub bin Mohd Yunus (2006). *Fahaman Wahabi Menular: Satu Analisis Terhadap Dakwaan Yang ditimbulkan oleh Akhbar Utusan*. Johor Bharu: Penerbitan Jahabersa.
- Muhammad bin Abd al-Wahhab (1979). *Ma'a Aqiedatus Salaf Kitabut Tauhid Bersihkan Tauhid Anda Dari Noda Syirik* (diselenggara: Mustafa Al 'Aliem). Surabaya: Penerbit P.T Bina Ilmu.
- Muhammad Fuad Kamaluddin (2004). *Wahhabisme: Dari Neraca Syara'*. Rembau: Madrasah al-Taifiqiah al- Husainiah.
- Muhammad Salih Uthaimin (t.t). *Liqah' al-Bab al-Maftuh*. (t.t): Dar al-Watan li al-Nasyr
- Syed Ahmad bin Syed Zaini Dahlan (2008). *Permata Yang berharga: Hujah Menolak Fahaman al-Wahhabi* (terjemahan Syed Zain bin Husain al-Habshi).
- Zulkifli Mohamad al-Bakri (2005). *Hukum Bacaan al-Quran untuk Si mati: Adakah Sampai Pahala?* Sungai Merab: Darul Fuqaha Enterprise.